

漢

濱

集

欽定四庫全書

漢濱集卷四

宋王之望撰

表狀

賀皇太后回鑾成書文

慈闈久服大典初成垂簡策以增光罄幅員而共慶竊以鄭開大隧猶誇考叔之功漢割鴻溝乃逸侯公之語傳傷溢美史恨闕文偉哉聖孝之隆著此信書之實恭維皇帝陛下樂天而保大屈己以寧親億萬斯年躬定

太平之業五十而暮日承長樂之歡冠百行以無前作
一經而詔後臣遠將使指阻造朝班編之詩書喜鋪張
於偉績老於文學期歌誦於中興

荊門軍謝到任表

傳經庠序愧非重席之才假守湖山更忝分符之寄肅
趨官次祇戴君恩伏念臣窮苦寒生羈單冷旅始延世
賞旋策賢科逢聖代之崇儒入賢闕而講藝三年訓詁
安朝暮之齏鹽萬里丘墳感春秋之霜露維茲小壘密

接故鄉久深懷土之情忽冒專城之寵田萊雖曠已稍
復於流通風俗還淳爰絕希於開訟獲承人之實便已私
此盖伏遇皇帝陛下功濟羣生仁侔列聖不泄邇不忘
遠允恢無外之風在知人在安民猶謹維良之選顧雖
庸鄙亦玷使令臣敢不悉意頒宣究心撫字願聖朝有
勞來還定之政可舉而行使斯民無歎息愁恨之聲庶
免於戾

潼川運判謝到任表

熊湘持節方虞瘵曠之誅梓蜀觀風忽假轉輸之任叨
逾滋甚感惕交深伏念臣儒業荒疎吏能淺薄比玷外
臺之寄刼來南嶽之陽道德意志慮於遠民雖殫夙夜
行歛散阜通之良法蔑效涓埃敢期申命之頒曾靡終
更之待矧潼江之一道亞益部於四川維將漕之攸司
久攝官而虛次俾承空乏宜屬賢能豈謂凡才乃膺遴
選此蓋伏遇皇帝陛下躬湯一德執舜兩端王業載隆
久同符於治古使華分遣尤加意於遐方故雖綿弱之

資亦誤使令之末臣敢不悉心餉餽畢力馳驅謹留州
送使之常務一遵於憲度體足國裕民之制期兩便於
公私

潼川提刑謝到任表

久司飛輓之權曾微善最就易平反之職不改部封命
節增華汙顏有覲伏念臣早專樸學晚竊賢科願朝廷
渥澤之所加何臣子涓埃之足道祇安愚分忽誤明恩
維諫官御史之昌言必大夫國人之公論敢圖列薦濫

采虛名遂煩聖造之曲成斯實清時之盛美資聯內閣
奉裕陵丕顯之謨體重外臺光蜀道皇華之遣靜思疎
逖可謂超逾此蓋伏遇皇帝陛下日月照臨乾坤覆育
申九歌於帝典嚴八柄於天官信任臣隣曾四目四聰
之弗壅甄明爵賞雖一嘖一笑以無私致若孤蹤亦膺
異寵臣敢不激昂晚暮勉事功雲漢昭回方問乘槎
之上并參捫歷更輸叱馭之忠

茶馬司進馬狀

位正九重欣覩聖明之造心傾四海願修職貢之祥前
件馬來自殊方之外廐載驅遠路雖慚八駿之良入獻
大庭敢備七騶之副

茶馬司合進銀馬狀

盛德重明出撫帝王之運綿區同載畢修臣子之恭前
件物常賦之餘殊方所出精良入貢閑居三品之珍駟
駿效牽敢備七騶之副

皇太后聖筭八十賀皇帝表

三朝受籍屬臨文德之朝萬歲稱觴式展慈寧之慶化
流寰宇歡動宮闈恭維皇帝陛下性體堯仁躬行舜道於
斯為盛承太姒之徽音受祉既多小魯侯之燕喜禮成
中禁福集新元孝感神明格母儀於上壽澤施耆艾慰
人子之至情臣承乏外臺與聞盛事千官入賀想環珮
之丁當四海霑恩快雷風之鼓舞

皇太后升遐慰皇帝表

夙鍾慶祚誕育清躬艱深百罹從先皇而北狩始終七

閔享孝養於東朝方延上壽之期光撫中興之運何期
寔窅永隔晨昏恭維皇帝陛下孝慕至深悲摧罔極願
追承於理命用少抑於聖情臣使事有拘不遑奔赴闕
廷臣無任銜哀抱痛擗踊感傷之至

謝授太府少卿四川總領到任表

貳列卿於外府猥廁廷紳主經賦於上游仍將使指省
躬曷稱拜命知榮伏念臣少奉拘儒老為俗吏偶明時
之弗棄乃煩使之屢更去朝初自於乞麾入蜀繼叨於

移節驅馳九載綿歷五司雖殫夙夜之勤蔑有涓埃之
效薦蒙增秩比復賜環雷電取將已下仙官之敕蓬瀛
且至却回方士之船渙號申頌訓詞溢美亞班聯於七
寺之長督餽餉於六師之屯引私諱以有陳觸報聞而
莫避凌競就列顛仆是虞此蓋伏遇皇帝陛下道配施
生功函動植公聽達四聰之壅兼收屈羣策之長詢事
考言判人才之真偽循名責實極王政於清明致若孤
蹤亦塵劇任臣敢不交修食貨兼裕軍民江漢朝宗徒

抱愛君之志并參捫歷益堅許國之心

謝授太府卿表

主計坤維苟遠曠官之責陞華月寺忽驚增秩之榮更
膺修舉之褒愈切叨塵之媿伏念臣早專儒學初乏吏
能於財賦以何資尤性資之所短矧當調餉乃誤使令
宿重戍於三邊開新疆於兩路轉輸麓給皆朝廷申畫
之明凱捷屢騰實將帥驅馳之力夫何綿薄猥冒恩光
此蓋伏遇皇帝陛下仁孝獨隆德刑並舉聰明睿智而

不殺偉畧無前是非賞罰之已明微勞必錄故雖疎遠亦被甄收然臣哀病日侵事功難彊投閑置散已屢貢於忱誠治劇濟煩恐終辜於寄委願回明鑒俯照丹衷
賀降赦恢復州軍車駕親征至建康府表

寇虐方張天誅遽及輿圖席卷宣渥澤以規恢禁旅星陳幸留都而經畧並天同快振古希聞竊以皇天眷有宋之仁全付所覆北狄據中華之壤洪維作威慨念遺黎久淪虐政屬逆酋之送死渝信誓以稱兵不戢自焚

果速乾谿之禍有征無戰遂收淝水之勲勞軍親屈於
時巡撫遠肆推於需宥恭維皇帝陛下沈幾獨運英武
無前以安民保大之心伸取亂侮亡之舉天回日轉爰
興順動之師雨施雲行用慰來蘇之衆漢主威加於四
海唐宗恥雪於百王臣備使遐陬欣聞盛事執玉帛而
趨禹會莫陪方嶽之朝披金石以昭聖功願刻神丘之
頌

天申節賀表

赤伏告祥式應興王之運濁河變色聿丁誕聖之期彌
月載臨普天胥慶竊以社稷靈長之祚有開必先祖宗
積累之休克昌厥後方斗樞之呈瑞適星火以揚輝實
真人受命之符見炎德中天之兆恭維皇帝陛下順帝
之則與神為謀堯巍巍而成功已清國步舜業業而致
孝允格天心措一世於安榮躋兆民於仁壽屬此載生
之節彌稱久曠之儀廣庭上萬歲之觴百辟獻千秋之鑑
九賓咸設六樂具陳長樂承顏應記熊羆之夢寶隣修

聘永休貌虎之師臣濫守偏州莫觀盛禮祝椿松之筭
願效華封傾葵霍之心徒瞻魏闕

寶運有開亶聰明而作后寰區胥載祝富壽以多男凡
懷傾日之心共慶流虹之旦竊以歲在姬訾之分藝祖
肇生律中蕤賓之音大辰畢見維聖神之誕育推年月
以應期知真人受命以同符昭火德中天之有兆恭
維皇帝陛下明同離照健協乾行舞階敷禹舜之仁問
寢躬文王之孝鴻圖永固方將混文軌於車書鳳歷長

新豈特等山河於帶礪臣軍符濫假官守攸拘稱萬歲
之觴阻趨漢殿上千秋之鑑徒慕唐臣

賀太上皇帝遜位表

淵衷素定上格皇天神器至公親授天子乾坤清謚夷
夏懽呼恭維太上皇帝陛下政始憂勤功收保定正南
面而恭己三紀垂衣為天下而得人一朝脫屣發於獨
斷不待耄期戴黃屋以非心神交姑射席白茅而問道
壽比崆峒臣久荷寵靈遠司餽餉讀詔書而有感頌歎